

少君石像太真金釵

拾遺記漢武帝詔李少君謂曰朕思李夫人可得見乎君曰
可遙見不可同於嶂嵬閭海有潛英之石其色青輕如羽毛
寒盛則石溫暑盛則石冷刻之爲像不異真人使此石像往
則真人至矣帝後得石卽命工圖刻作夫人形像刻成乃置
於輕紗幕裏宛若生時帝大悅

仙傳拾遺楊幽通本名什伍幼遇道士教以考召之術明皇
幸蜀馬嵬之後屬念妃子不已乃召什伍至行朝上問其事
對曰雖天上地下冥冥之中鬼神之內皆可歷而求之上卽
命什伍遍加求訪然莫知其所後於蓬萊山南宮西廡有羣

道藏輯要

三洞群仙錄

尊

翼集五

仙所居上元女仙張太真卽貴妃也什伍往見之曰我太上
侍女隸上元宮聖上卽太陽朱宮真人偶以宿緣世念頗重
謫於人間此後一紀自當相見乃取開元中所賜金釵鈿合
各半玉龜子寄以爲信聖上見此自當省憶言訖流涕而別
什伍以此物進之上潛然良久

元子奉戒季偉長齋

真誥元子少好道遵奉戒法至心苦行日中菜食鍊形守精
不接外物州府辟聘一無降就或遊山林屏棄風塵志願憑
子晉於緱岑侶陵陽於步元故改名爲元子自字爲延期矣
登真隱訣云季偉昔長齋三年竭誠單思乃能服日月光芒